

Ilanngussaq III

Aalisarnerup teknikkikkut iluarsartuussivigineqarnera pillugu nalunaarut - tunngaviusumik killeqarfimmit 3 smilit iluini aalisarnermik piniutit nalunaaqutserneqarsimanerat.

Kalaallit Nunaata aalisarnikkut oqartussaaffigisaani tunngaviusumik killeqarfimmiit 3 smilit iluini aalisarnermi atortut uninngaannartut ikkunneqarsimassapput nalunaaqutserneqarsimassallutillu taamaasilluni:

- 1) Aalisarnermi atortut avannamut isuat aalisarnermi nalunaaqutsiussamik qernertumik erfalasortalimmik ataatsimik sungaartumillu qaamanermut akisuttartumik ataatsimik nalunaaqutserneqarsimassaaq.
- 2) Aalisarnermi atortut kujammut isuat aalisarnermi nalunaaqutsiussamik qernertunik erfalasortalinnik marlunnik sungaartunillu qaamanermut akisuttartunik marlunnik nalunaaqutserneqarsimassaaq.
- 3) Aalisarnermi nalunaaqutsiussat radarip qinngornerinut akisuttartulernerneqarsinnaapput.
- 4) *Pullatit* piginnittup aqqanik aamma najugaanik imaluunniit angallatip aqqanik aamma umiarsualiviup ilisarnaataatut naqinnernik imermik pitarneqarsinnaanngitsunik nalunaaqutserneqarsimassapput..

Piniutit/atortut nunamut aalajangerneqarsimasut.

- 5) Piniutinut/atortunut isuata aappaa nunamut aalajangerneqarsimasuni isua isorleq nalunaaqutsiinnarneqarsinnaavoq aalisarnermi puttaqummit ammalortumik/puttaqummik aappaluttumik imaluunniit sungaartumik qalipaatilimmik.

Aalisarnermi nalunaaqutsiussat

- 6) Aalisarnermi nalunaaqutsiussaq immap qaavaniit mikinerpaamik 1 meteritut portussuseqassaaq.
- 7) Aalisarnermi nalunaaqutsiussaq piginnittup aqqanik najugaanillu angallatilluunniit aqqanik umiarsualiviatu ilisarnaataanik naqinnernik imermik pitarneqarsinnaanngitsumik nalunaaqutserneqarsimassaaq.

Erfalasoq

- 8) Aalisarnermi nalunaaqutsiussami erfalasut assigiissapput kipparissuussallutillu.
- 9) Erfalasup naannerpaaffia minnerpaamik 20 cm-iussaaq.

Ilanngussaq III

10) Aalisarnermi nalunaaqutsiussami ataatsimi erfalasut marluk akunnerat minnerpaamik 20 cm-iussaaq.

Qaamanermut akisuttaatit

11) Aalisarnermi nalunaaqutsiussani qaamanermut akisuttaatit sakkortuumik akisuttartunik sanaajussapput sungaartunik minnerpaamillu sanimut 6 cm-itut silissuseqassallutik, killingusaaq kaajallallugu akisussinnaasuussallutik aalisarnermi nalunaaquttami sapinngisamik qutsinnerpaamut inissinneqarsimassallutik. Qaamanermut akisuttaatit marluk akunnerat minnerpaamik 12 cm-iussaaq.

Radarip qinngornerinut akisuttaatit

12) Radarit qinngornerinut akisuttaatit aalisarnermi nalunaaquttami sapinngisamik portunerpaamut inissinneqarsimassapput, sumiiffinniillu tamanit ungasinnerpaamik 2 sømilinit ungasitsigisumit radarikkut takuneqarsinnaassallutik.

Allunaasat

13) Allunaasat aalisarnermi atortunut nalunaaquttanut imaluunniit puttaqutinut ammalortunut kisaatinullu atorneqartut kivisinnaasumik sanaajussapput kivisinnaanngortinneqarsimassallutilluunniit.